

**BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA KAKANJ
Općinsko vijeće**

Broj: 01/1-36-Z/19
Kakanj, 28.11.2019. godine

Z A P I S N I K

**sa 36. redovne sjednice Općinskog vijeća održane 28.11.2019. godine (četvrtak) u velikoj sali za
sastanke Općinskog vijeća sa početkom u 9:00 sati
(sažetak zapisnika)**

Nakon intoniranja himne Bosne i Hercegovine, 36. sjednicu Općinskog vijeća otvorio je Slaven Katičić, predsjedavajući Općinskog vijeća i pozdravio prisutne.

Predsjedavajući je zamolio da vijećnici i vijećnice prijave svoje prisustvo.

Vijećnici i vijećnice prisutni na sjednici:

Džemal Bečirhodžić, Mejrema Purišević, Adnan Ibrahimspahić, Izudin Hrusto, Safet Šahman, Nadina Kovač, Edin Aliefendić, Amar Selimović, Muhamed Kubat i Namir Talić **(SDA)**

Jasmin Mušanović i Mugdin Gorak **(SBB BiH)**

Rešad Merdić, Adisa Škulj, Zerina Kovač, Fahrudin Buza i Mirsad Tursum (naknadno pristupio) **(S BiH)**

Eldin Mijoč i Enes Piljug **(SDP BiH)**

Slaven Katičić i Ivica Petrović (naknadno pristupio) **(HDZ BiH)**

Elvedin Delić (naknadno pristupio) **(A-SDA)**

Nusret Muslić, Evelin Bitić, Mirnes Merdić i Rizah Haračić **(samostalni vijećnici)**

Mujo Fafulić **(nacionalna manjina)**

Odsutni vijećnici: Mušija Semir **(samostalni vijećnik)**, Senad Alajbegović **(SDA)** i Ahmed Begić **(SDP BiH)**

Predsjedavajući je konstatovao da je na sjednici u momentu prijave prisutno 24 vijećnika i vijećnice, te da su se stekli svi potrebni uslovi za validan rad i odlučivanje Općinskog vijeća.

Pored vijećnika sjednici su prisustvovali:

Aldin Šljivo, općinski načelnik

Ferdo Mijač, sekretar Općinskog vijeća

Enver Kusić, sekretar organa uprave

Džihad Berbić, pomoćnik općinskog načelnika za finansije

Mirza Fazlić, pomoćnik općinskog načelnika za privredu, urbanizam i zaštitu okoline

Rešad Zaimović, pomoćnik općinskog načelnika za društvene djelatnosti, boračka pitanja, raseljena lica, izbjeglice i povratnike

Nurčo Kurtović, pomoćnik općinskog načelnika za imovinskopravne, geodetske poslove i katastar nekretnina

Bahrudin Arnaut, pomoćnik općinskog načelnika za opću upravu, radne i zajedničke poslove, lokalnu samoupravu i mjesne zajednice

Nurudin Hrusto, pomoćnik općinskog načelnika za civilnu zaštitu

Zijad Neimarlija, direktor Zavoda za planiranje i izgradnju općine Kakanj

Izviestioci, obrađivači, gosti:

Mirnes Bajtarević, direktor JP „Grijanje“ d.o.o. Kakanj
Edin Bjelopoljak, predsjednik Udruženja „Razvojni centar općine Kakanj“
Daut Bajramović, predstvanik OSCE-a

Predstavnici medija:

NTV IC Kakanj	„Naša riječ“	„Kaportal“
Radio Kakanj	„Kakanjlive“	„Klix portal“
„Kakanjske novine“	„Kakanj-x“	

Kratka saopćenja o radu sjednice i prethodnim pitanjima. U pripremi 36. sjednice Općinskog vijeća, Kolegij je razmatrao:

a) Zahtjev MZ Kakanj I za rješavanje problema cestovne infrastrukture

Zahtjev MZ Kakanj I za rješavanje problema cestovne infrastrukture Kolegij Općinskog vijeća dostavio je Zavodu za planiranje i izgradnju općine Kakanj na dalje razmatranje i postupanje.

b) Odgovor na Zaključak Kolegija Općinskog vijeća u vezi zahtjeva MZ Bukovlje i Kakanj II

Odgovor Zavoda za planiranje i izgradnju općine Kakanj na Zaključak Kolegija Općinskog vijeća u vezi zahtjeva MZ Bukovlje i Kakanj II Kolegij je primio k znanju.

c) Inicijativa Naše stranke za kupovinu prilagođenog ginekološkog stola za pregled žena sa invaliditetom

Inicijativu Naše stranke za kupovinu prilagođenog ginekološkog stola za pregled žena sa invaliditetom Kolegij Općinskog vijeća dostavlja općinskom načelniku i JU „Dom zdravlja“ Kakanj na dalje razmatranje i postupanje.

d) Inicijativa Naše stranke za izradu procedure ili radnog uputstva za upravljanje stranicama Općine Kakanj na internetu i društvenim mrežama

Inicijativu Naše stranke za izradu procedure ili radnog uputstva za upravljanje stranicama Općine Kakanj na internetu i društvenim mrežama Kolegij Općinskog vijeća dostavlja općinskom načelniku i Stručnoj službi za poslove općinskog načelnika na dalje razmatranje i postupanje.

e) Odgovor Službe za privredu, urbanizam i zaštitu okoline na inicijativu Naše stranke za izgradnju trotoara u ulici ZPO

Odgovor Službe za privredu, urbanizam i zaštitu okoline na inicijativu Naše stranke za izgradnju trotoara u ulici ZPO Kolegij Općinskog vijeća je primio k znanju.

f) Dostava prijedloga za Program rada Skupštine ZDK za 2020. godinu

Kolegij Općinskog vijeća je akt Skupštine ZDK za dostavu prijedloga za Program rada Skupštine ZDK za 2020. godinu prosljedio vijećnicima na znanje.

Usvajanje zapisnika sa 35. sjednice Općinskog vijeća:

Predsjedavajući je zapisnik sa 35. sjednice Općinskog vijeća stavio na glasanje, te je isti usvojen jednoglasno sa 24 glasa za.

Komentari na dostavljene odgovore na vijećnička pitanja:

Enes Piljug: je rekao da je dobio odgovor na pitanje postavljeno u vezi refundacije troškova ortopedskih pregleda za pripadnike RVI Kakanj. U istom se navodi da su Službi za društvene djelatnosti podnesena tri zahtjeva za refundaciju, ali se u sva tri slučaja radilo o osobama koja imaju lična primanja i invalidninu. Rekao je da smatra da bi prema tim osobama trebali imati više osjećaja i da se radi o zanemarivim sredstvima za Općinu, ali ista mnogo znače pripadnicima RVI, te da bi se trebao naći način da se tim licima refundiraju troškovi bez obzira da li imaju ili nemaju primanja.

Općinski načelnik (odgovor): je pojasnio da je do unazad nekoliko mjeseci doktor ortoped bio zaposlenik kakanjskog Doma zdravlja i ti pregledi se nisu naplaćivali, ali kako je on otišao iz Doma zdravlja sada se angažuje ortoped van Kaknja i ta usluga se naplaćuje. Rekao je da je sa Uduženjem RVI Kakanj prije par dana imao sastanak na kojem je između ostalog dogovoren i način refundacije predmetnih pregleda ubusuće za pripadnike RVI, a sve opet u saradnji sa Domom zdravlja Kakanj.

Nusret Muslić: je rekao da je dobio odgovor na pitanje u vezi infrastrukturnih ulaganja u MZ na području općine. Rekao je da je u proteklim godinama veliki iznos sredstava uložem u infrastrukturu u MZ, ali isto tako je vidljivo da postoji nesrazmjer u uloženom po MZ. Zbog toga je apelovao na savjete svih MZ da se dodatno angažuju i apliciraju projekte prema Općini, kako bi se ostvario približno podjednaki odnos ulaganja u infrastrukturu MZ-a.

Izudin Hrusto: je tražio pojašnjenje u vezi dobijenog odgovora oko općinskih stipendija, tačnije pitao je da li će stipendije biti isplaćene do kraja godine.

Rešad Zaimović (odgovor): je rekao da je planirano da se općinske stipendije isplate u narednih 15-ak dana, što znači do kraja tekuće godine.

Slaven Katičić: je rekao da je dobio odgovore na pitanja postavljena u vezi vlasničkih odnosa na zemljištu gdje se kao vlasnik vodi Župni ured Kakanj. Na jedno postavljeno pitanje je dobio odgovor, ali mu nije dostavljena tražena dokumentacija, pa je istu ponovo zatražio. Što se tiče pitanja u vezi uložene žalbi na predmete u postupku harmonizacije podataka u katastru i ZK uredu, je rekao da mu nije dat adekvatan odgovor, a prema njegovim informacijama žalba je uložena samo u jednom predmetu, ali je naglasio da će u cijelosti odgovore komentarisati nakon što dobije odgovore na ova pitanja od ZK ureda Općinskog suda u Kaknju.

Komentari na dostavljena mišljenja na vijećničke inicijative:

Enes Piljug: je rekao da je dobio mišljenje na inicijativu oko izgradnje trotoara duž regionale od Karaulskog polja do Donjeg Kaknja u kojem se navodi da je prije bilo kakvog posla potrebno izraditi projektnu dokumentaciju kojom bi se utvrdila potrebna sredstva za realizaciju inicijative. Još se navodi da ukoliko se Budžetom Općine planiraju sredstva za ovaj projekat kao priprzetni, tokom naredne godine bi se moglo pristupiti realizaciji iste. Iz tog razloga je predložio da se predmetni projekat planira u izradi prijedloga Budžeta za 2020. godinu, jer smatra da ovaj posao treba da ima značaj prioritetnog.

Rizah Haračić: je rekao da u odgovoru na inicijativu za sanaciju ceste u MZ Dumanac stoji da u Budžetu nema sredstava za rekonstrukciju ceste. Smatra da inicijativa od strane Zavoda nije shvaćena, jer on nije tražio rekonstrukciju ceste, već samo sanaciju nakritičnijih mjesta zašto nisu potrebna značajnija izdvajanja, pa je zamolio Zavod da iznađe mogućnosti da izvrši traženu sanaciju.

Amar Selimović: se zahvalio za realizaciju inicijative koja se odnosila na postavljanje usporivača brzine na lokaciji ulaza u dvorište Osnovne škole Ahmed Muradbegović.

Vijećnička pitanja:

Enes Piljug: je postavio dva vijećnička pitanja. Prvo šta je navedeno da se prati/mjeri monitoringom u okolinskoj dozvoli izdatoj RMU „Kakanj“ od strane Federalnog ministarstva okoliša i turizma, odnosno da li su to buka i prašina i koliko puta godišnje treba vršiti mjerenja, a radi se o pretovarnom sistemu u naselju Karaulsko polje i drugo zašto nije do kraja završen projekat vodosnadbijevanja naselja Hrastovac.

Nusret Muslić: je postavio dva vijećnička pitanja i to da li je završena aktivnost po zaključku Općinskog vijeća vezano za popis domaćinstava i privrednih subjekata po MZ sa podacima o vrsti ogrijeva i načinu zagrijavanja objekata, te ukoliko je navedna aktivnost okončana da se dostavi izvještaj u pisanoj formi, te drugo pitanje koje vrste alternativnih goriva se koriste za energetske potrebe u procesu proizvodnje u TC Kakanj, na osnovu kojih i od koga izdatih okolinskih dozvola.

Rizah Haračić: je postavio pitanje ko je izdao odobrenje za postavljanje stabilnih usporivača brzine u MZ Doboj kod pasarele preko željezničke pruge i u MZ Bičer u ulici Željeznička, te s tim u vezi kako će se vršiti zimsko održavanje saobraćajnica na ovom dijelu, jer se postavljeni usporivači ne mogu ukloniti za vrijeme zimskog održavanja.

Safet Šahman: je postavio dva vijećnička pitanja. Prvo da li je dio puta Donji Kakanj – kamenolom „Trgošped“ u planu za održavanje zimske službe, s obzirom da su se promijenile okolnosti, odnosno da li je isti regionalni put i mijenja li nadležnost. Drugo pitanje zašto nije izvršena sanacija puta za Brnjic kod niskog mosta, koji je oštećen još 2014. godine, a radi se o gruboj sanaciji (nasipanje i zatezanje puta frakcijom).

Amar Selimović: je postavio pitanje kada će se izvršiti popravka javne rasvjete na mostu u Bilješevu i koji je razlog zbog kojeg ista nije popravljena do sada, odnosno da li su to finansijski ili neki drugi razlozi.

Namir Talić: je postavio dva vijećnička pitanja. Prvo da li Općina Kakanj zajedno sa privrednicima općine Kakanj ima Strategiju zapošljavanja i stambenog zbrinjavanja mladih naše općine i drugo da se pojašni pojam „prijateljsko okruženje“ i gdje je najpreče utrošiti sredstva koja se izdvajaju na ime zaštite okoliša koje plaća JP Elektroprivreda BiH, a to se odnosi i na koncesije od TC Kakanj i eventualno RMU „Kakanj“.

Predsjedavajući je konstatovao da su vijećnici Evelin Bitić, Slaven Katičić i Mirnes Merdić podnijeli vijećnička pitanje bez korištenja govornice.

Evelin Bitić: je postavio dva vijećnička pitanja. Prvo da mu se dostave podaci o broju upisanih učenika u osnovne i srednje škole na području općine Kakanj za period 2010-2019. godina i to za svaku školu posebno u navedenom periodu i drugo kada će doći do prošireja mreže daljinskog grijanja na području općine Kakanj i da li će se mijenjati cijena po m² u narednom periodu.

Slaven Katičić: je postavio pitanje ko je posjednik i vlasnik parcele 342/50 k.o. Popi na kojoj je izgrađen frizerski salon i na temelju čega je upisan u posjedovnom listu, te da mu se dostave dokumenti po kojima je izvršen taj upis i odgovor u čijem je vlasništvu u zemljišnom uredu navedena parcela.

Mirnes Merdić: je postavio vijećničko pitanje kada će se završiti izgradnja rasvjete u MZ Brnjic, obzirom da se nešto od tog posla uradilo, a ostao je dio kroz Brnjic.

Vijećničke inicijative:

Evelin Bitić: je podnio dvije vijećničke inicijative. Prva je da se na svakoj narednoj sjednici Vijeća uvrsti tačka dnevnog reda pod nazivom „Sloboda govora“, iz razloga što se neke stvari ne mogu komentarisati kroz vijećnička pitanja i inicijative. Druga inicijativa je za održavanje tematske sjednice Općinskog vijeća u cilju prezentiranja i pronalaska adekvatnog rješenja za poboljšanje kvalitete zraka u zimskim mjesecima koji predstoje.

Safet Šahman: je podnio dvije inicijative, prva da se planiraju sredstva za vanjsko uređenje prostora oko ambulante Krševac, kao i da se planiraju sredstva za unutarnje opremanje ambulante u saradnji sa Domom zdravlja Kakanj i druga da se planiraju sredstva za drugu fazu izgradnje rasvjete u naseljenom mjestu Podborje zašto je potrebno oko 35.000 KM.

Rizah Haračić: je podnio dvije vijećničke inicijative i to da se preispita rad u vrijeme državnih praznika od strane pojedinih pravnih lica, jer smatra da se može i treba uticati na svijest pojedinih privrednika da poštuju državne praznike. Druga je da se izvrši odsumporavanje blokova u TE Kakanj kako je planirano i utvrđeno zaključcima sa javne rasprave održane u TE Kakanj, te zaključcima Općinskog vijeća Kakanj.

Enes Piljug: je podnio dvije vijećničke inicijative. Prva je da se planiraju sredstva u Budžetu Općine za 2020. godinu za završetak projekta rasvjete u Podborju, jer je prvom fazom obuhvaćen samo jedan manji dio naselja, dok veći dio naselja nije obuhvaćen zbog nedostatka sredstava. Druga je da se planiraju sredstva u Budžetu Općine za 2020. godinu, kako bi Općina Kakanj pomogla plaćanje računa za komunalne usluge (voda, smeće i grijanje) za sve socijalne slučajeve na našoj općini.

Namir Talić: je podnio dvije inicijative. Prva je da se da se u dijelu ulice ZPO-a iznad Poleta uradi rekonstrukcija ceste, jer je ta cesta svega 50-tak metara udaljena od gradske saobraćajnice i nalazi se u veoma lošem stanju pa mještani nisu u mogućnosti da autom dođu do svojih kuća. Druga je da načelnik Općine formira radnu komisiju koja će posjetiti MZ Slapnica, izaći na teren i razgovarati sa predstavnicima Savjeta MZ i ostalim mještanima i upoznati se sa problemima koje ima MZ Slapnica, a u toj MZ ima niz neriješenih problema.

Utvrđivanje dnevnog reda:

Predsjedavajući je napomenuo da je prijedlog dnevnog reda usaglašen na sjednici Kolegija koja je održana 20.11.2019. godine, pa je predložio dnevni red po pozivu za 36. sjednicu, te je napomenuo da su u međuvremenu pristigli i dodatni materijali od Službe za imovinskopravne, geodetske poslove i katastar nekretnina i Službe za finansije.

Nurčo Kurtović: je predložio da se u dnevni red 36. sjednice uvrste tačke: „Prijedlog odluke o davanju saglasnosti za potpisivanje ugovora o uspostavi prava služnosti, zatim „Prijedlog odluke o utvrđivanju javnog interesa u svrhu izgradnje pristupnog puta“, te „Prijedlog rješenja o utvrđivanju prava vlasništva u korist Razije (Rušida) Kubat iz Kaknja“.

Džihad Berbić: je predložio da se u dnevni red uvrsti tačka „Prijedlog zaključka o izmjeni i dopuni Zaključka o preduzimanju mjera i aktivnosti za zaključenje ugovora o koncesiji za istraživanje i eksploataciju energetske mineralne sirovine-mrkog uglja“.

Eldin Mijoč: je rekao da se protivi proširivanju dnevnog reda sa dodatnim tačkama, te je upozorio da se time krše i odredbe Poslovnika o radu Vijeća, kao i da je postalo praksa da se na sjednici Vijeća uvrštavaju nove tačke, pored onih koje je Kolegij utvrdio kao dnevni red sjednice. Na taj način se vijećnici dovode u situaciju da raspravljaju o materijalima koje nisu uspjeli pročitati.

Slaven Katičić: je pozvao sve vijećnike da poštuju odredbe Poslovnika o radu i naglasio da je on kao predsjedavajući predložio dnevni red usaglašen na Kolegiju, te da je samo napomenuo da su nakon održanog Kolegija pristigli dodatni materijali.

Eldin Mijoč: je ponovio da se vijećnicima ne bi trebali dostavljati materijali koji su pristigli nakon održanog kolegija.

Općinski načelnik: je rekao da materijali koji su naknadno dostavljeni vijećnicima, a koji nisu hitnog karaktera ne bi trebali da se uvrštavaju u dnevni red, pa je u skladu s tim predložio da se na današnjoj sjednici doda u dnevni red samo tačka „Prijedlog zaključka o izmjeni i dopuni Zaključka o preduzimanju mjera i aktivnosti za zaključenje ugovora o koncesiji za istraživanje i eksploataciju energetske mineralne sirovine-mrkog uglja“, jer je taj materijal kasno stigao iz ministarstva, a bilo bi nužno da se o njemu odluči kako se procedura oko potpisivanja koncesionog ugovora ne bi dodatno produžila.

Rizah Haračić: je rekao da po njegovom mišljenju nije sporno da se svi dodatni materijali uvrste u dnevni red obzirom da su isti putem e-parlamenta dostavljeni vijećnicima ranije, tako da je bilo dovoljno vremena da se pripreme za diskusiju po istima.

Predsjedavajući je stavio na glasanje prijedlog da se u dnevni red uvrsti tačka „Prijedlog zaključka o izmjeni i dopuni Zaključka o preduzimanju mjera i aktivnosti za zaključenje ugovora o koncesiji za istraživanje i eksploataciju energetske mineralne sirovine-mrkog uglja“, što je usvojeno jednoglasno sa 26 glasova za.

Predsjedavajući je predložio da nova dodana tačka bude uvrštena kao 4. tačka dnevnog reda, te bi Vijeće raspravljalo o ukupno 6. tačaka.

U raspravi po predloženom dnevnom redu nije niko učestvovao, te je Vijeće jednoglasno sa 27 glasova za, usvojilo dnevni red za 36. sjednicu.

Usvojeni dnevni red:

1. Prijedlog zaključka o usvajanju Izvještaja o izvršenju Budžeta Općine Kakanj za period 01.01-30.09.2019. godine
2. Prijedlog zaključka o utvrđivanju Nacrta Budžeta Općine Kakanj za period 01.01-31.12.2020. godine
3. Prijedlog zaključka o utvrđivanju Nacrta odluke o izvršavanju Budžeta Općine Kakanj za period 01.01-31.12.2020. godine
4. Prijedlog zaključka o izmjeni i dopuni Zaključka o preduzimanju mjera i aktivnosti za zaključenje ugovora o koncesiji za istraživanje i eksploataciju energetske mineralne sirovine-mrkog uglja
5. Prijedlog programa utroška sredstava od nakande za građevinsko zemljište za 2019. godinu
6. Informacija o radu Udruženja „Razvojni centar općine Kakanj“ za period januar – juni 2019. godine

Tačka 1.

Prijedlog zaključka o usvajanju Izvještaja o izvršenju Budžeta Općine Kakanj za period 01.01-30.09.2019. godine

Predlagač: Općinski načelnik

Obrađivač: Služba za finansije

Izvjestilac: Džihad Berbić, pomoćnik općinskog načelnika

Stav i mišljenje: Komisija za budžet i finansije

U diskusiji je učestvovao Nusret Muslić.

Nusret Muslić: je naglasio da je iz Izvještaja o izvršenju Budžeta za tri kvartala vidljivo da je isti realizovan znatno manje nego što je bilo planirano, pa je stoga pozvao nadležnu Službu da prilikom planiranja Budžeta za narednu godinu ima u vidu izvršenje u tekućoj godini i da to bude osnovica za planiranje.

Vijeće je Zaključkom usvojilo Izvještaj o izvršenju Budžeta Općine Kakanj za period 01.01-30.09.2019. godine, sa 25 glasova za, 2 protiv, bez glasova uzdržan.

Tačka 2.

Prijedlog zaključka o utvrđivanju Nacrta Budžeta Općine Kakanj za period 01.01-31.12.2020. godine

Predlagač: Općinski načelnik

Obrađivač: Služba za finansije

Izvjestilac: Džihad Berbić, pomoćnik općinskog načelnika

Stav i mišljenje: Komisija za budžet i finansije

U diskusiji je učestvovao Mujo Fafulić.

Općinski načelnik: je napomenuo da je ovo jedan od najvažnijih dokumenata koji Vijeće usvaja. Dao je dodatna pojašnjenja zbog čega su pojedine stavke planirane u manjem, a druge u većem iznosu u odnosu na 2018. i 2019. godinu. Naveo je da smatra da je Budžet za 2020. godinu, prilično realan i da će kao takav omogućiti realizaciju prioritarnih stvari u 2020. godini.

Mujo Fafulić: je rekao da planirani iznos sredstava na ekonomskom kodu 614300 „Podrška radu udruženja nacionalnih manjina“ nije dovoljan za rad udruženja, jer prema informacijama kojima raspolaže u Kakanju je registrovano oko 2.500 pripadnika nacionalnih manjina, pa prema tome proizilazi da se po glavi pripadnika nacionalne manjine izdvaja 0,40 KM godišnje. U tom pravcu je predložio da se iznađe način da se iznos na predmetnom kodu poveća.

Džihad Berbić: je pozvao sve zainteresovane da prijedloge amandmana dostave u pismenoj formi u periodu javne rasprave o Nacrtu Budžeta, te je predložio javnu raspravu u trajanju od 15 dana i to počev od 28.11.-12.12.2019. godine.

Vijeće je usvojilo Zaključak o utvrđivanju Nacrta Budžeta Općine Kakanj za period 01.01-31.12.2020. godine, uz provođenje javne rasprave u trajanju od 15 dana i to počev od 28.11.-12.12.2019. godine sa 27 glasova za, bez glasova protiv i uzdržan.

Tačka 3.

Prijedlog zaključka o utvrđivanju Nacrta odluke o izvršavanju Budžeta Općine Kakanj za period 01.01-31.12.2020. godine

Predlagač: Općinski načelnik

Obrađivač: Služba za finansije

Izjavitelj: Džihad Berbić, pomoćnik općinskog načelnika

Stav i mišljenje: Komisija za budžet i finansije

U diskusiji nije niko učestvovao i Vijeće je jednoglasno usvojilo Zaključak o utvrđivanju Nacrta odluke o izvršavanju Budžeta Općine Kakanj za period 01.01-31.12.2020. godine, uz provođenje javne rasprave u trajanju od 15 dana i to počev od 28.11.-12.12.2019. godine, sa 27 glasova za.

Tačka 4.

Prijedlog zaključka o izmjeni i dopuni Zaključka o preduzimanju mjera i aktivnosti za zaključenje ugovora o koncesiji za istraživanje i eksploataciju energetske mineralne sirovine-mrskog uglja

Predlagač: Općinski načelnik

Obrađivač: Služba za finansije

Izjavitelj: Džihad Berbić, pomoćnik općinskog načelnika

U diskusiji su učestvovali Safet Šahman, Eldin Mijoč, Slaven Katičić, Rizah Haračić, Rešad Merdić, Ivica Petrović, Evelin Bitić i Izudin Hrusto.

Općinski načelnik: je upoznao vijećnike sa sadržajem predloženih izmjena i dopuna postojećeg Zaključka Vijeća. Rekao je da je suština predloženih izmjena u produženju roka za podnošenje novih tužbi, odnosno povlačenje postojećih, pa umjesto dosadašnjeg datuma 30.11.2019. godine, produžava se rok do 28.02.2020. godine. Rekao je da se to čini iz razloga što je u proteklom period održan niz sastanaka u cilju zaključenja koncesinog ugovora, te da je na istima iskazana spremnost od strane Vlade ZDK i Rudnika da konačno dođe do realizacije tih aktivnosti. Naveo je da očekuje da do kraja godine dođe do raspisivanja javnog poziva za dodjelu koncesija na koji način bi se ostvarile pretpostavke da koncesioni ugovor bude zaključen do novoodređenog roka. Osim navedenog, predloženim izmjenama i dopunama se predviđa davanje mogućnosti Rudniku da jednokratnu koncesionu naknadu koja iznosi oko 1,4 miliona KM, plaća Općini u periodu od 48 mjeseci, što je predloženo od strane Rudnika prema ministarstvu s obzirom na finansijske prilike Rudnika, pa je na osnovu toga ministarstvo tražilo saglasnost Općine. Na kraju je rekao da smatra da bi vijećnici trebali podržati predloženo i učiniti još jedan korak ka zaključenju koncesionog ugovora.

Safet Šahman: je tražio da mu se odgovori da li će i kojoj mjeri produženje predmetnih rokovi uticati na početak radova na probijanju puta za Brnjic.

Eldin Mijoč: je napomenuo da je ugovor o koncesiji sa Rudnikom trebao da bude zaključen još prije 18 godina, kada je donesen Zakon o koncesijama. Rekao je da smatra da je produženje roka još jedan način za odlaganje zaključenja koncesionog ugovora i održavanje postojećeg stanja. Što se tiče davanja saglasnosti na plaćanje jednokratne koncesione naknade u mjesečnim ratama rekao je da smatra da Vijeće nije nadležno za donošenje takve odluke, te da to direktno utiče na realizaciju projekata koji su planirani da se finansiraju iz tih sredstava. Rekao je da se ne može diskutovati o koncesionoj nakandi dok još uvijek koncesioni ugovor nije zaključen. Smatra da je predmetno traženje ministarstva nedobronamjerno prema građanima Kaknja, pa je prema tome i predloženi zaključak neprihvatljiv pogotovo u dijelu kojim se odobrava plaćanje naknade u ratama.

Slaven Katičić: je rekao da se ne radi o produženju roka na duži period i da je to prihvatljivo, kao i davanje mogućnosti da se jednokratna koncesiona naknada plaća u mjesečnim ratama, jer je poznato da i drugi državni organi daju mogućnost svojim dužnicima da zaostale obaveze izmire u ratama. S druge strane ovim se pomaže i Rudniku da lakše prebrodi finansijske obaveze koje mu predstoje. Rekao je da mu je poznato, iz niza sastanaka kojima je prisustvovao zajedno sa Općinskim načelnikom, da

nadležno kantonalno ministarstvo daje punu podršku zaključenju koncesionog ugovora i čini sve što je u njihovoj nadležnosti da bi se provela procedura koja prethodi zaključenju koncesionog ugovora.

Eldin Mijoč: je rekao da ne smatra da nadležno kantonalno ministarstvo kao ni Vlada ZDK rade svoj posao ispravno, isto kao i ranije Vlade, a u prilog tome ide činjenica da koncesioni ugovor nije zaključen već 18 godina od kada je donesen Zakon.

Slaven Katičić: je ponovio da je on samo govorio o činjenicama i onim stvarima koje su mu lično poznate.

Rizah Haračić: je rekao da bi o predmetnom materijalu trebali više diskutovati pragmatično na način kako da se riješi problem. Još je naglasio da se u konkretnom slučaju radi o plaćanju jednokratne koncesione naknade, koji prihod nikad do sada nije bio u Budžetu Općine. Rekao je da aktivnosti aktuelnog načelnika na zaključenju koncesionog ugovora svakako treba podržati, jer je ovo prvi put da se ulaže ovoliki angažman da bi se došlo do zaključenja ugovora, a iz svega proizilazi da se to može očekivati za 2-3 mjeseca. Također, rekao je da se omogućavanjem plaćanja jednokratne koncesione naknade u ratama izlazi u susret i Rudniku, o čijem značaju za Kakanj je suviše diskutovati.

Općinski načelnik: je pojasnio da se u predmetnom zaključku radi o davanju saglasnosti na obročno plaćanje jednokratne koncesione naknade koja iznosi oko 1,4 milina KM, a ne koncesione naknade koja će se plaćati godišnje u iznosu od oko 1 milion KM. Rekao je da aktivnosti oko probijanja puta za Brnjic neće biti odložene zbog produženja roka za zaključenje koncesionog ugovora, te je naglasio da se ovim nastoji izaći u susret Rudniku kako ne bi došao u situaciju da ne može izmirivati svoje obaveze. Još je naveo da će Rudnik priklikom potpisivanja koncesionog ugovora izdati mjenice, kao sredstvo obezbjeđenja plaćanja svojih pruzetih obaveza. Na kraju je upoznao vijećnike da je pod gotovo identičnim uslovima Rudnik Banovići potisao ugovor o koncesiji sa Vladom TK i Općinom Banovići, odnosno da predloženi zaključak nije nešto nepoznato kad se govori o predmetnoj materiji.

Rešad Merdić: je rekao da se ušlo u jedan proces oko zaključenja koncesionog ugovora koji treba završiti. Rekao je da se na ovaj način olakšava Rudniku plaćanje obaveza, jer je svima poznato u kakvoj su situaciji svi rudnici u BiH, pa tako i kakanjski. Na kraju je napomenuo da je na prethodnoj sjednici Vijeća predložio da se u narednoj budžetskoj godini sredstva za put za Brnjic planiraju iz sredstava ostvarenih radom termoelektrana, a ne od koncesionih nakanada.

Evelin Bitić: je naglasio značaj Rudnika za Kakanj i da s toga treba iznaći način da se izađe u susret Rudniku bez obzira na određene loše finansijske aspekte.

Rizah Haračić: je zatražio od vijećnika poštivanje Etičkog kodeksa.

Eldin Mijoč: je rekao da se iz predloženog zaključka može zaključiti da se pored već podnesenih tužbi mogu podnijeti i nove, ali po drugom osnovu, a zaključkom se rokovi za podnošenje tih novih tužbi produžuju, te da se iz navedenog potvrđuju njegove konstatacije iz ranije diskusije po ovoj tački dnevnog reda.

Izudin Hrusto: je pozvao sve vijećnike da podrže predloženi zaključak jer se procedura oko zaključenja koncesionog ugovora dovela gotovo do kraja, te da se ovim činom ima prilika završiti veoma značajan proces za Općinu Kakanj.

Nakon diskusije Vijeće je usvojilo Zaključak o izmjeni i dopuni zaključka o preduzimanju mjera i aktivnosti za zaključenje ugovora o koncesiji za istraživanje i eksploataciju energetske mineralne sirovine-mrkog uglja, sa 22 glasa za, 2 glasa protiv, bez glasova uzdržan.

Tačka 5.

Prijedlog programa utroška sredstava od nakande za građevinsko zemljište za 2019. godinu

Predlagač: Općinski načelnik

Obrađivač: Zavod za planiranje i izgradnju općine Kakanj

Izvestilac: Zijad Neimarlija, direktor Zavoda

U diskusiji nije niko učestvovao i Vijeće je usvojilo Program utroška sredstava od naknade za građevinsko zemljište za 2019. godinu, jednoglasno sa 23 glasa za.

Tačka 6.

Informacija o radu Udruženja „Razvojni centar općine Kakanj“ za period januar- juni 2019. godine

Predlagач: Udruženje „Razvojni centar općine Kakanj“

Obrađivač: Udruženje „Razvojni centar općine Kakanj“

Izjavitelj: Edin Bjelopoljak, predsjednik Udruženja

U diskusiji je učestvovao Evelin Bitić.

Evelin Bitić: je pohvalio rad Udruženja Razvojni centar i činjenicu da daju podršku idejama mladih koje uključuju u svoj rad, te je pozvao Vijeće da za narednu budžetsku godinu Udruženju poveća budžet, kako bi mogli iskazati svoj puni potencijal.

Vijeće je usvojilo Zaključak o primanju k znanju Informaciju o radu Udruženja „Razvojni centar općine Kakanj“ za period januar-juni 2019. godine, jednoglasno sa 21 glasom za.

Predsjedavajući je zaključio rad 36. sjednice Općinskog vijeća u 12:20h.

Audiozapis sa sjednice Vijeća pohranjen je u elektronskoj formi (CD-u) i sastavni je dio ovog Zapisnika.

**SEKRETAR
OPĆINSKOG VIJEĆA**
Ferdo Mijač

**PREDSJEDAVAJUĆI
OPĆINSKOG VIJEĆA**
Slaven Katičić